



# IRAOLA'TAR ERRUPIN JAUNARI BEARTUTAKO ERANTZUN BAT

Ekainillaren 10'eko D.V. egunkarian Iraola'k isekaz idatzi zuanari erantzunez, egunakari berean ekainillaren 20'an argitaratua da idazlan au.

Illaren 10'ean argitaratu zenuan idazlanak, zenbait aldiz izendatzeaz gaiñera, beartu egiten nau erantzun bat bederen ematera.

1'go: Jolas-giro alaiz artzea eztabaidak, ez da bide txarra. Aserre artzea baiño obea, noski. Baiña norbait bere iritzietan ongi oiñarriturik dagoanean, ez da bearrrezkoa, —eta ez da egokiena— besteari isekarik egitea. Beste batzuen bizkar irri egitea, beste norbaitzuk parregarri utzi naiz, ez dira biderik egokienak nork bere egiak eta iritziak argitsu azaltzeko. Baiña.. tira!

2'gn: ..."eskerrik asko, gauzak nola ez diren egin bear esateagatik". Gauzak oker, nola ez ditugun egin bear jakitea, ez da naikoa. Ortan egia diozu, borobilla egia. Baiña... lenengo beintzat, zer dagoan oker edo gauzak nola ez ditugun egin bear, ori jakin bear dugu. Ori jakin ezik, oso nekez egingo ditugu zuzeneko eran.

Ez dala naikoa? Ba dakit ez dala naikoa, eta zuzeneko eran egiten ikasi bear genukeala ere ba dakit, baiña oso zaila dala ere bai. Baiña lenengoa lenengo: aalik oker gutxien lenengo, eta urrena... aalik ongien egitea lortu bear.

3'gn: "Humanismo" nola esaten dan euskeraz jakitea. ez duzula lortu. Iztegiaren III'gn zatiaz ari zeranez, eta "Idealismo" itza jorratzen duanez egilleak orri orlan, jakingo duzu nun aurkitu.

4'gn: Jo dezagun orain akats ala ez-akatzetara. Oso egoki erabil genezake "lodi EDO gizen" esateko. Baiña "Urtaroa, Eguraldia, Ingurugiroa" neretzat beintzat ez dira ain berdiñak, tartean berdintasunezko EDO idatzi aal izateko. Azkue ta Altube'ri jarraituz, iru itz oien artean, egokiagotzat jarriko NAIZ itza, eta ez EDO.

5'gn: Ona emen beste esaldi baten muiña bere osoan, ariari jarraituz: "Gure konstituzio fisiologiko eta psiko-somatikoAk badute zerikusirik" Zuzeneko eran begira, "psiko-somatikoEk", bear zuala idatzi nuan eta orlan nago. Eta zuk ezetz diozu, ain juxtu ere "bi singular dira `eta' juntagailluaz loturik". Zein dira "singular" oiek? Bat dan, ala geiago diran, zerk erabakitzen du: izen-lagunak, ala IZENAK? Or dago koxka. Eta zuk IZEN BAT ipiñi duzu eta EZ BI SINGULAR, ez orixe! BI ipiñi dituzu, baina IZEN-LAGUNAK dira. Adibide batek argitzen du ongienik: "Lagun alai ta jatorrak badu zerikusirik"... "Lagun alai ta jatorrek badute zerikusirik". Aditza "badute" jarri zenuanez, ez dago beste bide egokirik. Gaurkoz naikoa izango da. Agur terdi.

**Gaztañaga'tar Jesus'ek**